

„DOMSKI ŽIVOT“

„ Smrću je samo obasjana staza uspona od gnijezda do
zvijezda“



Juni, 2016

BROJ:38

KORISNICI PIŠU...

REMI SA SOBOM I OKOLINOM

Svaki period sadrži lijepe uspomene. I onaj u srednjoj školi, i uspomene vezane za Foču, i svi oni trenuci u kojima su me pratili stihovi poeme “ Mala moja iz Bosanske Krupe”.

Lijepe uspomene me podsjećaju i na period kada sam bio u Atletskom klubu “ Sarajevo”. Bacao sam kuglu. Tada je sve bilo na amaterskoj osnovi, za razliku od današnje atletike u kojoj, kao i uostalom u svim sportovima, iza svakog sportskog uspjeha stoji i biznis što se posebno vidi na olimpijadama.

Broj osvojenih zlata ovisi uglavnom od ekonomskog stanja zemlje, iz koje dolazi atletičar. Jedino su trkači izuzetak. Atletski klub “ Sarajevo” je bio pri samom vrhu ex- yu atletike. Imao je šampione kao što su Vilić, Saračević, Goić, Radošević, Pilav...

Šah je zamijenio atletiku. Uuu, kakve se borbe vode na šezdeset četiri polja! Ali, nekako najradije završavam partiju remijem. Kao da me remi oslikava :

pomiren sam sa sobom i važno mi je da sam u dobrom društvu. Najmanje je važno čiji će kralj da bude u vodoravnom položaju.

U centru se osjećam veoma lijepo. Sa smiješkom kažem da smo svi mi u centru pažnje, brige, pa se ta brižnost prenosi u odnose koji vladaju među ukućanima “ Centra”. Ako se jesen može nazvati godinama u kojima smo, onda je to zlatna jesen.

**PREMA KAZIVANJU: ČOLPA HUSEINA,
(ODLOMAK IZ KNJIGE ŽIVA SLOVA SPOMENARA SUGRAĐANA TREĆE
DOBI AUTORA MIRSADA BEĆIRBAŠIĆA)**

JEDAN DAN U DOMU

Sada ću vam to da objasnim, kako izgleda jedan dan u domu. To vam je kao roj pčela u košnici. U šest sati ujutru već je gužva, svako traži svoj ključ. Od pola sedam do sedam počinje radno vrijeme, svako zna svoj posao i svi su u pokretu.

Svi oni koji primaju inzulin, su već pred vratima ambulante, dok sestrice pripremaju lijekove. Njegovateljice su u pokretu, spremačice takođe, a i u večeraju je već živo. Džana sa svojom družinom kreće u nove pobjede.

Sociolog Ensar je u kancelariji i hvala mu što me uvalio u rad sa salvetama.

Majstori su na okupu, jer ubrzo i oni svako na svoju stranu, jer ih čeka posao.

Dina otvara salon i poziva na brijanje i šišanje. Fizioterapeuti su spremni da prime svoje pacijente poslije doručka. U restoranu korisnici već odavno ispijaju svoju jutarnju kafu. U pola osam je doručak, servirke već spremne, a bogami i kuhari.

Prije doručka dolazi doktorica, gospođa Amina. Direktor je već odavno došao, a i ostali službenici.

Počinje prava parade, jedni idu tamo, drugi ovamo svako za svojim poslom.

Mi korisnici smo spremni za doručak. Huso je parkirao auto I čeka ko je određen taj dan za kliniku.

Srećemo gospođe Adelu, Ćamilu, Meri, Elviru, Sanelu, Vahidu, Edisu .

Sanela ide od stola do stola i svakom posebno saopštava danas u devet imamo to i to, u jedanaest je to i to.

Tako dan u domu ide dalje svojim punim tempom, jer to je samo početak poripreme za dnevnu i noćnu aktivnost.

AUTOR : BEŠIĆ MUGDIN

SMIJEŠNA STRANA SVIJETA

- Žena mi je sumnjiva, prva mi je predložila da kupimo ormar.
- Došao Mujo po malog u vrtić. Mujo: “ Ja sam došao po malog Hasu? Odgajateljica će na to: “ Kojeg pošto ih imamo pet”? Mujo će na to: “ Pa bilo kojeg, ionako ću ga sutra vratiti”.
- Zašto su udate žene deblje od neudatih? Neudate žene dođu kući vide šta ima u frižideru, i odu u krevet. Udate dođu kući, vide šta ima u krevetu i odu u frižider.
- Šta se dobije kada se ukrsti zmija i jež? Dva metra bodljikave žice.
 - Zašto Crnogorac spava noću? Zato što odmara danju.
 - Zašto je zmija omiljena životinja Crnogorcima? Leži, a ide.
 - Šta zec nosi na leđima? Orla.
 - Šta postaje slijepi miš poslije operacije? Obični miš.

ODABRAO: BEŠIĆ MUGDIN

SEKCIJE I RADIONICE

U saradnji sa KJU “ Porodično savjetovalište”, nastavljene su psiho-socijalne radionice u sklopu projekta, jačanje socijalne uključenosti za osobe treće životne dobi. Projekat nosi naziv Zlatna jesen, okupio je dvadesetak najaktivnijih korisnika Centra. Radionice drži socijalni radnik iz Porodičnog savjetovališta Amer Šenderović.

Projekat se sastoji iz četiri radionice koje se održavaju jednom sedmično, a sa finalne dvije radionice održane u mjesecu junu zaokružen je čitav projekat.

Takođe napravljena je pauza i za školu glume do septembra. Zbog lijepog vremena većina radionica i sekcija je održana napolju uz ugodnu atmosferu i druženje.

Svi smo uz lijepu atmosferu i ugodno druženje uživali u raznoraznim aktivnostima, a pored korisnika koji stalno prisustvuju na sekcijama zbog lijepog vremena pridružio nam se i veliki broj nepokretnih i dementnih korisnika.

SLIKE SA SEKCIJA I RADIONICA



POSJETA UČENIKA O.Š. "MEŠA SELIMOVIĆ"

Centar posjetili učenici O.Š. "Meša Selimović" u pratnji razrednice. Razred V1 se družio sa korisnicima, učenici su ih počastili slatkišima i voćem a izveli su i nekoliko recitacija, otpjevali nekoliko dječijih pjesama i sevdalinki. Obećan je nastavak saradnje, jer svaki put djeca izazovu najviše emocija i oduševljenja kod sviju nas svojom iskrenošću, humanošću, i dobrotom koju samo čisto dječije srce može pružiti.

SLIKE SA POSJETE UČENIKA O.Š. "MEŠA SELIMOVIĆ"





POSJETA TABAČKOG MESDŽIDA

Centar posjetili članovi Kluba knjige Tabačkog mesdžida iz Sarajeva, koji djeluje kao neformalna grupa pojedinaca, okupljenih sa ciljem izučavanja pisane riječi. Grupa od šest studenata na čelu sa psihologom Ozrenkom Čamdžić, družili su se sa korisnicima, razgovarali o životu i pisanoj riječi jer je i cilj bio druženje u sklopu literarne sekcije. Pored ovoga studenti su igrali i šah sa korisnicima, te su u dogovoru obećali nastavak saradnje i u narednom periodu.

SLIKE SA DRUŽENJA SA TABAČKIM MESDŽIDOM





**I OVOG MJESECA, ODRŽANA JE NAGRADNA IGRA BINGO. DOBITNIK
BINGA JE MISIRLIĆ DŽEVAD. ČESTITAMO!!!**

